

BILTZARREAN LANALDIA LEGEZ URRITZEAREN AURKA AZALDU DIRA GIPUZKOAKO ENPRESARIAK

«Gezur hutsa da 35 orduak enplegua sortzen dutela»

■ Lanorduak legez murriztuz enplegu berriak sortzen direla gezur hutsa dela diote Gipuzkoako enpresariak, «inon ere ez baita hori frogatzea lortu». Hori dela eta, Frantziak eta Italiak egin dutena arduragabekeria iruditzen zaie enpresariei.

A. Agirreurreta / Donostia

GIPUZKOAKO enpresariak ez dute lanorduak murriztea nahi, ez bederen legez, Frantziak edo Italiak egin duten modura. Adegik enpresarien elkarteak biltzar nagusia egin zuen atzo Donostian, eta besteak beste lanorduen murrizketak izan lezakeen eragina aztertu zuten. Biltzarrean azaleratu zenez, enpresariak garbi asko ikusten dute 35 orduko lanaldiak enpresen lehiakortasuna arriskuan jar dezakeela, lan kostuek gora egingo luketelako. Horrezaz gainera, sindikatuek eta hainbat alderdi politikok galdetzen duten lanaldi murrizketak ez luke langabezia jaitziko.

«35 orduko lan asteak arbelean funtzionatzen du, ez beste inon. Inon ez da frogatu lanaldi laburragoak enplegua sortzen duenik. Gezurra da 35 orduak enplegua sortzen dutela, gezur hutsa». Hala ohartarazi zuen Jose Maria Ruiz Urtxuegik, Adegiko idazkari nagusiak, biltzarrean jorratutako gaien berri emateko. «Hor konpon Frantzia eta Italia. Haien erantzukizuna izango da lege horien ondorioz gertatutako dena». Azken hogeita bost urteetan Gipuzkoan urteko lanaldia 41 egunetan murriztu dela ere esan zuen Ruiz Urtxuegik, «baina, hori lan hitzarmenaren emaitza da».

Hazkunde sendoa eta lan harrerean egonkorak • Gainontzean, lan hitzarmenetan adosteko negoziazioetan ez dute aparteko arazorik izan Gipuzkoako enpresariak, alor gehienetan 2001. urtera arteko akordioak izenpetuta baitaute. Ondorioz, langileekin dituzten harremanetan «lasaitasuna» eta «egonkortasuna» izan dira nagusi.

Halaber, egoera ekonomikoak ez ditu enpresariak kezkatzen, azken hilabeteotako enpresa jardueraren adierazle nagusiak bikainak baitira. Industria produktzioaren indizeak, esaterako, %10 egin du gora urte hasieratik Gipuzkoan, Espainian baino lau hamarren gehiago.

Enpleguan ere antzematen ari da hazkunde. Urtarriletik kontratazioak %20 egin du gora Gipuzkoan, eta enpleguak, aldiz, %5,3. Industriak eman dio bultzada indartsuena enpleguari, eta horri esker urte amaieran langabezi tasa %15era jaitziko da. «Hainbat eskualdetan langabezi tasa teknikoak dago, %3 ingurukoa, eta esku lan espezializatua lortzeko arazoak daude. Goierrri eta Leiz bailaran, esaterako, langabezi tasa %10etik behertu da. Europako Batasuneko



Adegiko ordezkariak Gipuzkoako ekonomia-aren hazkundearen sendoa dela azpimarratu dute.

EDURNE KOCH

Adegik dio ez duela gehienezko zerga tasa eztabaidatuko

PERTSONA Fisikoen Errentaren gaineko Zergaren erreforma dela eta, Gipuzkoako enpresarien elkarteak oso begi onez ikusi du aldundiek eta Jaurilaritzak proposamen ireki bat egin izana. «Konfiantza» badute, eta enpresariak egingo dituzten proposamenak aintzat hartuko dituztela uste dute.

Erakundeek aurkeztu duten PFEZren Libu-

ru Zuriaren gaineko balorazioak egiteko, zuhertasun handiz ari-tu dira Gipuzkoako enpresariak, «eztabaidarako abiapuntua izanda, eta zerga kontuan Liburu Zurian agertzen diren ideien interpretazioa delako garrantzitsua».

Dena dela, Adegikoek azpimarratu dutenez, enpresariak ez dute gehienezko zerga tasa eztabaidatuko. «Ez gara

guri pertsonalki eragin-go digun neurri baten eztabaidan sartuko. Enpresari talde gisa, inbertsioei, aurrezpenei edo enplegua sustatzeko neurriak soilik eztabaidatuko ditugu».

Atzo Adegikoek zerga tasa eztabaidatzeko asmorik ez zutela esan zuten arren, herenegun Confebask (EAEko enpresari elkartearen konfederazioak) zerga tasaren mailakatzea

kritikatu zuen, zergak gisa horretan ordainduz prestakuntza eta iniziatiba handiagoa zuten herritarrek zigotzen direlakoan.

Dena dela, Adegik hutsune nabarmenak ikusi ditu erakundeek egindako zerga erreformarako proposamenean, besteak beste aurrezpenak inbertsio-etara bideratzeko neurriak jaso ere egiten ez duelako. X

Nekazaritza ekologikoak Nafarroan oso laguntza eskasak dituela salatu du EHNEK

■ Bihar nekazari ekologikoaren eguna ospatuko dute Lakaben

Erredakzioa / Iruñea

NAFARROAKO GOBERNUAK nekazaritza ekologikoa sustatzeko behar adina ez duela egiten salatu zuen atzo Euskal Herriko Nekazarien Elkarteak (EHNE). Nekazarien elkartearen datuen arabera, Espainiako Estatuko autonomia erkidegoen sailkapenean azkena ageri da Nafarroa. Espainian eta Hego Euskal Herrian 622 milioi pezeta inbertitu zituzten iaz nekazaritza ekologikoa bultzatzeko; gehien Murtziak inbertitu zuen (%36,7) eta haren atzetik Gaztela-Leonek (%24). Nafarroa, berriz, azken postuan ageri da, %0,5arekin.

Nafarroak urtean lau milioi pezeta besterik ez ditu inbertitzen nekazaritza ekologikoaren sustapenean. Dirutza hori Europako Batasunaren programa baten bidez iristen da, baina EHNEren idurikoz programa hori ez da batera egokia Nafarroarako. Dirulaguntzak eskuratu ahal izateko lursail handiak eskatzen dituzte, eta nekazari xume asko laguntzarik gabe geratzen dira. Gainera, dirulaguntza 200.000 pezetakoa da gehienez. Beste autonomia batzuetan dirulaguntzak oparagoak dira.

EHNEk dioenez, laguntzarik eza traba handia da nekazaritza ekologikotik bizi nahi duten nekazariarentzat: «Oso babes eskasa jasotzen dute erakunde ofizialen aldetik, eta, gainera, oso garesti ateratzen zaie ekoizle gisa alta ematea, Kontseilu Araztaileak finantzatzeko diru dezente behar baita. Kontuan hartu behar da, halaber, gero ez daukatela taxuzko sarrerik produktuak merkaturatzeko».

Hori guztia dela eta, EHNEk babes handiagoa eskatuko du bihar, Lakaben, nekazari ekologikoaren egunaren ospakizuneari. X



GETXOKO UDALA
AYUNTAMIENTO DE GETXO

GETXOKO UDALTZAINZAKO LANPOSTUAK

Getxoko Udaltzaintzako 10 lanpostu, 1998ko Lan Eskaintza Publikoaren bidez aterata, betetzeko hautaketa saioetan jardun ahal izateko eskaera orriak aurkezteko epea eta tokiak hurrena azaldukoak dira, hona: hementik **1998ko uztailaren 6ra, 14:00ak arte**, eta Udaleko Erregistro orokorra (Foruak k., 1) eta Hiritarren Arretako Bulegoa (Erronko auzoa, Aurrezki Kutxa k., 3).



Osakidetza
Servicio vasco de salud



OSASUN SAILA
DEPARTAMENTO DE SANIDAD

OSAKIDETZA

ANESTESISTAK behar dira.

Non: **Zumarragako ospitalean**
Argixao auzoa, z/g
20700 ZUMARRAGA
GIPUZKOA
Tfnoak.: 943.72.30.02
943.72.39.11

Kontratazio mota: Aldi baterako izendapena urtebeterako (luzagarria).
Baldintzak: Aditua anestesian eta erreanimazioan.

Eskaerak aurkezteko epea: Iragarri hau argitaratu ondoko 10 egun.
Informazio gehiago jasotzeko, interesatuek Ospitaleko Pertsonaleko Zuzendaritzara jo dezakete.